



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6 Yangia anidakangma : Tir Yimym tiryimym@aolima tir yimym TAPAK 8

Taruba küm 5 tsungda Greater Tiraland takhangba samatsü

Sports Minister Anurag Thakur-i Khelo India Winter Games lapoktsüogo

VOL. XX NO. 120 (ADOK 120) DIMAPUR KÜPTOKNÜ (SATURDAY) TSÜKLAI (FEBRUARY) 11, 2023 ₹ 5.00

## 'Cow Hug Day' amongtsü mepishiba agiener

New Delhi, February 10, 2023 (Agencies): Centre sorkari tuyuba ama February 14 nü 'Cow Hug Day' amongtsü temepishiba meyipa agir ta Animal Welfare Board of India (AWBI)-i Hokolbarnü metetdaksü.

Nübertemi February 14 nü 'Cow Hug Day' among nungbo kanga ajungtsü ta Minister of Fisheries, Animal Husbandry and Dairying Parshottam Rupala-i ashiba sülen anogo ka lir iba temepishiba meyipa agienogo. Alima nung February 14 nü Valentine's Day amonger.

"Bangdak ketdangpurtem aser

Ministry of Fisheries, Animal Husbandry and Dairying ajanga tuyuba ama Animal Welfare Board of India-i February 14, 2023 nung Cow Hug Day amongtsü mepishiba meyipa agir" ta AWBI secretary S K Dutta-i sangdong ka nung ashi.

Animal Welfare Board of India ya 1962 küm Prevention of Cruelty to Animals Act, 1960 nung Section 4 kübok tentetba lir. Iba Board ajanga animal welfare organizations nem senotsü teyari agütsür aser Centre sorkar dang shiruru anepalutsü asoshi shisalen sayur.

## DMC Market cum parking facility lapoktsü

Dimapur, February 10, 2023 (TYO): Dimapur kübok New Market nung DMC Market cum parking facility renemogo aser kobi melii lapoktsü.

February 13, 2023 nungi iba tesem nung traffic timi azüoktsü atema one-way traffic inyakyim tenzüksü, ta Commissioner of Police, Kevithuto Sophie IPS-i metetdaksü.

Nyamo Lotha Road (NL Road) tsütsü nungi New Market leni aruba garitem dang market area-i aitsü aser GS Road leni tugutsü. NL Road nungi aruba garitem dang 'overhead parking

facility' nung anentsü akok aser iba nung 2-Wheelers aser 4-Wheelers atema tesem lir, ta pai sangdong ka nung ashi.

Dhobinala tsütsü nungi New Market leni aoba garitem overhead parking facility ajanga dang sütsü aser Nyamo Lotha Road (NL Road) leni tugutsü. Dhobinala tsütsü nungi aruba garitem dang parking facility nung anentsü, ta Commissioner of Police-i ashi.

Army supply police point nungi New Market-i aiba lenmang tashi nung garitem anentsü memelar, ta paisa metetdaksü.

## Nagaland talenba nungi salatsü: Congress

Dimapur, February 10, 2023 (TYO): Nagaland nung nübertemi tenokdangba kecha melii vote enoktsütsü ayongzüker ta Congress-i tanü metetdaksü.

"Congress nem vote enokja sorkar akümsü maongka ngura onoki Nagaland nung tesempatep aser sen politics talenba nungi salatsü" ta AICC Media Coordinator Nagaland, Advocate Mahima Singh-i ashi.

"Sorkar mozü kitem, school, college aser sorkar kiojentem ya Congress sorkar mapang shisateta yangluba lir. Congress-i Nagaland nung alirtem mulungjang nung teimla adokdaksütsü" ta Mahima Singh-isa metetdaksü.

"Congress-i Nagaland nung alirtem asoshi healthcare infrastructure tajungtiba agütsütsü, lanurtem mapa inyaksü maongka agütsütsü aser Naga nung medical & paramedical staff-i nübertem yaritsü" ta laisa ashi.

BJP-i Nagaland chief minister Neiphiu Rio alenbanga lir kechiyong parnoki high court building aser medical colleges amala pai inyaksabatem meteta lir, ta Mahima Singh-isa metetdaksü.

"BJP nungi Rio'er medemertemi iba tangatetba nung inyaksangshir. Nenok chief minister-i ochimashi inyakbatem

parnoki meteta lir aser iba jagi pa alenbanger" ta laisa ashi.

CM Rio-i Nagaland nung alirtem dang pa indang "report card" metetdaksütsü ayongzüker, ta laisa ashi.

Centre-i Kohima Medical College atema parnok lemezükba Rs 171.10 crore agütsü saka state sorkar ketdangsürtemi governor Jagdish Mukhi dang tiyazü ashi. Covid wara ajanga senotsü magütsü ta ketdangsürtemi governor Mukhi dang ashi saka November 22, 2019 nung senotsü ajunga agütsüogo, ta Mahima-i metetdaksü.

February 18, 2021 nü CM Rio-i academic year 2022-23 nungi Kohima Medical College indang admissions tenzüksü ta nangzük süra tanü iba tenangzükba kong lir? ta laisa asüngdang.

Külen, Mon Medical College atema Centre indang telemsa Rs 292.5 crore nungi Rs 242.5 crore Rio'er sorkar nem agütsüogo, ta Mahima-isa ashi.

"Nagaland health and family welfare minister S Pangnyu Phom ya BJP MLA la lir aser iba jagi parnoki nübertem dang nangzükba meinyaker. Centre-ibo Kohima Medical College atema sen lemezükba ajunga agütsüogo aser Mon Medical College atema sen 90% agütsüogo" ta laisa metetdaksü.

## Constituency 59 nung voters lakh 13.06-i candidate 183 tia yanglutsütsü BJP candidate Kazheto Kinimi-i Akuluto A/C nung takok nguogo



February 10, 2023 nü Chief Electoral Officer (CEO) Nagaland, V. Shashank Shekhar-i anir ketdangsürtemi osangbener den senden amendang agiba noksa ka angur.

Kohima, February 10, 2023 (TYO): February 27, 2023 nü NLA election indang polling anogo nung vote enoktsür lakh 13.06 temai candidate 183 tia yanglutsütsü. Taküm election nung tetsür candidate 4 dena lir.

Akuluto constituency nung BJP candidate aser MLA teinyakdak Kazheto Kinimi den tetokteper Congress candidate N. Khekashe Sumi-i tanü pa tenüng meyipa agiba ajanga Kazheto den tetokteper shinga mali takok nguogo. Anungji February 27 nü Assembly Constituency 59 nung dang polling asütsü.

"14 buba NLA atema election nung candidate 225-i nomination file asü aser iba nungi candidate 25 indang kulikakettem meshitak liasü aser candidate 16-i tenüng meyipa agi. Anungji candidate ajak agi 184 lir" ta Chief Electoral Officer (CEO) Nagaland, V. Shashank Shekhar-i ashi.

February 10, 2023 nü Hotel De Oriental Grand, Kohima nung CEO Nagaland, V. Shashank Shekhar-i anir osangbener senden den senden ka amen.

Nagaland nung constituency 60 nungi Akuluto constituency nung Kazheto Kinimi den tetokteper shinga maliba agi pai takok nguogo, ta Shashank Shekhar-isa metetdaksü.

Candidate 184 nungi 164 tashi political party 12 nungi lir.

Party aser candidate telemsa-Nationalist Democratic Progressive Party (NDPP) - 40, Bharatiya Janata Party (BJP) - 20, Indian National Congress (INC) - 23, Naga People's Front (NPF) - 22, Lok Janshakti Party (Ram Vilas) - 15, National People's Party (NPP) - 12, Nationalist Congress Party (NCP) - 12, Republican Party of India (Athawale) - 9, Janata Dal (United) - 7, Rashtriya Janata Dal - 3 aser CPI o Rising People's Party - kaka.

Taküm Assembly election nung Independent candidate 19 lir.

Nagaland nung vote enoktsür ajak agi nisung lakh 13,16,064 lir aser iba nung service voters 7,982 dena lir, ta paisa ashi.

Akuluto A/C nung vote enoktsür 10,014 lir anungji tanüngba Assembly Constituency 59 atema voters 13,06,050 lir.

Taküm election nung candidate teimba aliba Peren district kübok Tening, Wokha district kübok Sanis aser Mon district kübok Tehok lir. Item constituency nung candidate ajak agi trokrok (6) lir, ta CEO Nagaland-isa metetdaksü.

Maneni, tetsür candidate pezü lir aser parnokji Dimapur-III nung NDPP candidate Hekhani Jakhalu, Tening A/C nung

Congress candidate Rosy Thompson, Western Angami nung NDPP candidate Salhououuo aser Atoizu nung BJP candidate Er Kahuli Sema nung lir.

Voters tajemtiba aliba Polling Station ji 40 Bhandari kübok 71-Merapani nung lir aser iba Polling Station nung voters 37 lir. Külen voters teimtiba alibaji 32 Atoizu constituency nung 12-Usumomi lir aser iba nung voters 1,348 lir.

Assembly Constituency sasep nung voters teimba alibaji Ghaspani-IA/C nung 74,395 aser tajemtibaji Mokokchung Town A/C nung voters 8,302 lir, ta Shashank Shekhar-i metetdaksü.

State aser Central forces ajanga election nung yi, sen, mozü aser prangpong-injang beshiba azüoktsü atema mapa inyaka arudar, ta pai ashi.

January 18, 2023 nungi February 9, 2023 tashi nung Rs 35.60 crores tashi puogo, ta paisa ashi.

Iba nung sen Rs 2.71 crore, Rs 3.72 crore alangba yi, Rs 25.790 crore alang mozü aser Rs 3.46 crore osetsüset dena lir, ta CEO Nagaland-isa metetdaksü.

Nagaland nung tensa azüoktsü atema mapa inyakdar aser Wokha, Mokokchung o Mon district tem nung lendong kar atalokba atema teinyaktsü inyakogo, ta paisa ashi.

## 14 buba NLA elections: Candidate 16-i tenüng agienogo

Dimapur, Feb. 10, 2023 (TYO): 14 buba Nagaland Legislative Assembly Election atema election nung candidate 16-i parnok tenüng meyipa agiogo.

February 27 nü election atema tanü nomination file asiba meyipa agiba anogo tatemangba liasü aser tsünglanglen agüja alir nisung 16-i parnok tenüng meyipa agiogo.

1. P. Engo Konyak - (RPI) Athawale - 47 Aboi (ST) AC.
2. H.B. Moba - LJP(Ram Vilas) - 55- Tobu (ST) AC
3. Kelhouneizo Yhome - IND -

- 10-Northern Angami-1 (ST) AC
4. L. Shiakpong Konyak - IND - 55-Tobu (ST) AC
5. Y. Belong Chingmei - IND - 50-Longleng (ST) AC
6. R. Kilimong Yimchunger - IND - 60-Pungro-Kiphire (ST) AC
7. Kishan Lal Gupta - IND - 1-Dimapur-I (ST) AC
8. Supu Jamir - IND - 2-Dimapur-II (ST) AC
9. Er. L. Tongpang Longkumer - IND - 24-Angetyongpang (ST) AC
10. N. Khekashe Sumi - INC -

- 31-Akuluto (ST) AC
11. Y.M. Yollow Konyak - LJP(Ram Vilas) - 42-Wakching (ST) AC
12. Thongwang Konyak - Janata Dal(United) - 46-Mon Town(ST) AC
13. Kyupise Sangtam - IND - 59-Seyochung Sitimi (ST) AC
14. P. Mulang - INC - 56-Noklak(ST) AC
15. Kenyuseng Tep - IND - 12-Tseminyü (ST) AC
16. Gwalozu Kath - IND - 12-Tseminyü (ST) AC

" Na lenir makümdangbo takok ajakji ne terenlok asoshi, kodang na lenir kümdir takok ajakji tangar renloktsü asoshi " Jack Welch

- Ungma Baptist Arogo Laishir Telongjem Clean Election Tayongzükba

### Mkgnung Polling Personnel training tanabuba agiogo



**Dimapur, Tsüklai/February 10 (TYO):** 14th Nagaland Legislative Assembly 2023 atema aruya aliba General Election asoshi Mokokchung District kübok Polling Personnel pur nem training round tanabuba February 10, 2023 nü Mayangnokcha Government Higher Secondary School, Mokokchung nung agiogo. Prashant Kumar Panda IAS iba tesem semdanga training agirtem den sensaksema liasü.

### Chumoukedima nung M-3, EVM aser VVPAT amshitsü training agütsü

**Dimapur, Tsüklai/February 10 (TYO):** Deputy Commissioner, Chumoukedima indang Conference Hall nung February 10, 2023 nü central observer ajunga nem M-3, EVMs aser VVPATs tem amshitsü asoshi training agüja liasü. Deputy Master Trainer, Bodevi Shuya-i iba training ya agütsü aser iba mapang pai observer tem dang machine balala amshiyim indang angazükdakja liasü. Iba training nung General Observer, Jitendra Kumar Singh, IAS; Police Observer, Satish Kumar Gajbhiye, IPS; Election Expenditure Observer, Sunil Kisan Agawane, IRS-IT aser EAC Chumoukedima, Dzesengunuo Mere nungertem dena liasü.

### DC Tuensang ajanga postal ballot vote agütsütsü anogo sangdonger

**Dimapur, Tsüklai/February 10 (TYO):** Deputy Commissioner & District Election Officer, Tuensang, Nokchasashi ajanga sangdong ka nung ashiba agi, postal ballot atema Form 12 meshia alirtem asoshi vote ya agüja aliba tesem nung agütsütettsü:

Sl. No.	Category	Date	Venue/Facilitation Centre	Time
1	3 NAP, personnel	21 <sup>st</sup> Feb. 2023	Commandant Office	9:00 AM to 4:00 PM
2	DEF, Home Guard, Fire and Emergency Services	21 <sup>st</sup> Feb. 2023	SP Office Conference Hall, Tuensang	
3	DC/, Sector Officers, EEM Teams, Drivers, Micro Observers	22 <sup>nd</sup> Feb. 2023	Town Hall, Tuensang	1:00 PM to 4:00 PM
4	Polling Personnel Presiding & 1st Polling officer)	23 <sup>rd</sup> Feb. 2023	GHSS	
5	Polling Personnel 2n73rd Polling officers & Gr-IV	24 <sup>th</sup> Feb. 2023	GHSS	

### Mokokchung & Mon nung National De-Worming Day mungogo



**Dimapur, Tsüklai/February 10 (TYO):** Linük ajunga den külemi Mokokchung district nunga February 10, 2023 nü school tem, Anganwadi centers aser Health Unit tem nung National De-Worming Day munga liasü. Hill View Higher Secondary School, Mokokchung nung iba sentong tenzüka mapang Dr. Imsongienla, MO (Ayush) ajanga parasitic worms ajanga nisung temang nung timtem agütsüba, kaketshir aser tesayur temang anepaluyim indang jembia liasü. Tar nung tzüla (parasitic

National De-Worming Day tenzüksüogo. Deputy Commissioner ajanga iba anogomung aser tanurtem asoshi iba mozü kota tongtipang, item rateta ashi. Pai tanurtem dang temang aser temeket müreka ayutsü, mesen tabu balala nungi jembua alitsü ajungshia liasü. Chief Medical Officer, Mon, Dr. Vezokholu Theyo ajanga ashiba agi, National De-Worming Day ya linük nung tanur ajak mesen nungi jembua alitsü asoshi Ministry of Health & Family Welfare, Government of India ajanga tenzüka liasü. National De-Worming Day ya school-i ao metenzük aser school azünger tanur arishi küm 1 nungi 19 tsüngta ajunga nem mesen tepsetdaksüba mozü agütsütsü asoshi lir, ta ashi. Tanurtemtemang junga lidaktsütsü aser takum tajungba nung lidaktsütsü nükjidong nung iba sentong ya school aser Anganwadi center tem nung agir, ta paisa ashi.

worms) aliba ajemdaktsütsü asoshi tanur aser teinlong-long rogo nem mesen tepsetba mozü agütsütsü nükjidong nung iba anogo ya amunger, ta lai ashi. Laisa kaketshir dang teka müreka ayutsü yimyattem sayua liasü. Sentong temer RBSK team den Chief Medical Officer, Mokokchung indang office nungi staff temi tanurtem nem Albendazole mozü agüja liasü. Mon : Deputy Commissioner, Mon, Ajit Kumar Verma ajanga February 10, 2023 nü Konjong Higher Secondary School, Mon nung

### DC & DEO Mon ajanga photo identity document atema metetdaksür

**Dimapur, Tsüklai/February 10 (TYO):** Deputy Commissioner & District Election Officer, Mon, Ajit Kumar Verma ajanga sangdong ka nung ashiba agi, Election Commission of India ajanga taoba mapang metetdaksüba ama, vote agütsüba anogo Elector Photo Identity Card (EPIC) magütsüteter temi tsünglangen agüja aliba photo identity document rongnung ka agütsütsü akok: Aadhar card. MGNERGA Job Card. Bank/Post Office ajanga agütsüba Passbooks nung noksa keter aliba. Ministry of Labour indang Scheme kübok agütsüba Health Insurance Smart Card. Driving Licence. PAN Card. BPR kübok RGI ajanga agütsüba Smart Card. Indian Passport. Pension document den noksa ka. Central/ State Govt/PSUs/ Public Limited Companies ajanga agütsüba noksa keter aliba Service Identity Cards. MPs/MLA/MLCs ajanga agütsüba Official Identity Cards aser Unique Disability ID (UDID) Card, M/O Social Justice & Empowerment, Government of India.

### Dimapur nung AMRUT GIS senden amen

**Dimapur, Tsüklai/February 10 (TYO):** Department of Urban Development ajanga Greater Dimapur Planning Area atema GIS nung ajemdaker Atal Mission for Rejuvenation and Urban Transformation (AMRUT) Master Plan asoshi jembishini senton ka February 10, 2023 nü Dimapur nung aliba Tourist Lodge indang Conference Hall nung ayongzüka mena liasü. Iba scheme ya AMRUT phase -1 flagship programme indang sub component ka lir aser iba kübok Dimapur aser Kohima ya shimtet, ta Urban Development, Director Chenithung Lotha-i ashi. Iba scheme yagi Dimapur Municipal Council, East Dimapur Town Council, Chumoukedima Town Council aser yimtsüng 40 densema tasazük 143 square kilometer awajemtsü aser nütsüng yongsük lakh 4.95 dak rangloksü, ta pai ashi. Master plan ya nükla yur yangluba sentong ka lir, koba ajanga regional nungi micro level tashi yimti yangluba indang anepalutsü. Iba nung transportation nungi housing tashi asadanga yanglu aser terenlok mapa teinyaksa mesüi yimti indaktsütsü lenmangtem bushia lir, ta pai ashi. Hyderabad nung amenoka aliba Remote Sensing Instruments ajanga benokba master plan nung pei tangatetba lemsateptsü asoshi stakeholder tem den iba senden ya amener, ta ashi. Master plan ya agizükba sülen state sorkari iba scheme ya mapa kuma inyaktsü, ta consultant Dr. Rama Rao-i metetdaksü.

Observers tem den agüja aliba mobile number nungi jembitettsü mesüra nikonngang 3:00 - 4:00 ako tsüngta tsüngdong oa ajurutsü akok. General Observer: Aditya Kumar Anand, IAS Mobile No. 9863739778. Expenditure Observer: Aditya Kamlakar Somkumar, IRS Mobile No. 8787323578. Police Observer: Ajatshatru Bahadur Singh, IPS Mobile No. 9366960898.

### DC & DEO Longleng ajanga metetdaksür

**Dimapur, Tsüklai/February 10 (TYO):** Deputy Commissioner & District Election Officer, Longleng, Dharam Raj ajanga sangdong ka nung ashiba agi, Election Commission of India ajanga tongogo aser DUDA Rest House, Longleng nung anenzüka lir. Political party representative/election agent shirnok tasüngdangnüba/ ashishitepnüa ali, parnoki

### DC Tuensang ajanga absentee postal ballot voter atema metetdaksür

**Dimapur, Tsüklai/February 10 (TYO):** Deputy Commissioner & District Election Officer, Tuensang, Nokchasashi ajanga sangdong ka nung Senior Citizens, PwDs aser COVID-19 keta alitsü temolung melemteti alirtem mesüra iba tashidak agi menepa alir absentee voters tem postal ballot amshia vote agütsütsü asoshi anogo aser mapang yamai metetdaksür ta ashi:

Sl. No.	Date	Timing	Venue	Remarks
1	23/02/2023	08:00AM to 04:00PM	Address of AVSC/AVCD	1st visit
2	24/02/2023		AVCO applicants	2nd visit



February 10, 2023 nü Lucknow nung Uttar Pradesh Global Investors Summit 2023 tenzüksüba sentong nung Uttar Pradesh Chief Minister Yogi Adityanath aser Deputy Chief minister ana-Keshav Prasad Maurya aser Brajesh Pathak nungeri Ato kilonser, Narendra Modi nem sempet ka agütsüdang tangokba noksa nung angur.

### Hindu Sena-i India nung BBC nokdangtsü mepishiba SC-i magizük

**New Delhi, February 10 (Agencies):** Hindu Sena teloki Supreme Court dang India nunger litsü nung British Broadcasting Corporation (BBC) aser BBC India khenyongi nokdangtsü mepishia liasü, ajisüaka Hokolbarnü SC-i iba temepishibaji magizük. Tawa BBC-i 2002 küm Gujarat nung rara tulu adokba dak sendakba documentary "India: The Modi Question" adokba sülen mangatetep tulu adok, aser iba dak sendakba nung Hindu Sena-i iba temepishiba ya benok südi ta bilemer. Justices- Sanjiv Khanna aser M.M. Sundresh nati akümba bench-i, right-wing Hindu Sena Tir, Vishnu Gupta-i benokba temepishiba ya 'khenyongi tangatetba tai', ta metetdaksü. Iba ken o angadanga

mapang nung ken o benoker atema advocate, Pinky Anand-i, "Iba documentary sayaba mapang kechi atalokar shisadangang. Tanü India nunger ka UK nung Prime Minister lir aser nenok menden tulu nung lir. India ya rongsenkettzüng tashi tulu aliba linük ka kümдар," ta ashi. Ibaji langzúa Justice Khanna-i, "Iba onük nung o enteptsüsa na? Nenoki iba ya (BBC) khenyongi nokdangdaksüner asü? Ya kechi?" ta asüngdang. Iba sülen Anand-i Supreme Court bench matsüngdang iba ken o benok ajisüaka bench-i iba temepishiba ken oji magizük. February 3, 2023 nü Supreme Court-i Centre sorkar dang, Centre sorkari BBC documentary nokdangba anema kari ken o benoka lir, anungji iba

atemaji telangzüba agüjang, ta tuyua liasü. Justices Khanna aser Sundresh nati akümba bench-i Centre dang hopta asem tsüngda telangzüba agüjang, ta ashi aser maneni kasa ken oji April ita nung angadangtsü. January 21 nü Centre sorkari BBC-i sayaba documentary indang YouTube videos aser Twitter posts ajak agientsü tuyua liasü. Hindu Sena lenir Vishnu Gupta-i benokba temepishiba ajanga India nung BBC khenyongi nokdangba den külemi BBC-i India anema inyakba, India sorkar anema inyakba aser India nung BBC journalist tem anema bushisngdangtsü atema National Investigating Agency dang tuyuang, ta Supreme Court dang mepishia liasü.

### Opposition-i benokba onüktem indang PM-i mejembi: Kharge

**New Delhi, February 10 (Agencies):** Brihostibarnü Parliament nung Ato kilonser, Narendra Modi-i jembiba sülen anogo ka lir Congress Party Tir Mallikarjun Kharge-i, Ato kilonseri Parliament House anaprongla nung teti jembia aruba onük dang jembia saka opposition-i benokba tongtumbang onüktem atemabo kecha mejembi, ta aitsü.

telangzüba kecha magütsür," ta Kharge-i metetdaksü. Opposition party temi Adani Group ochimashi ken o bushisüngdangtsü atema Joint Parliamentary Committee (JPC) nem agütsütsüla, ta takhangba agüja aruba mapang nung Parliament nung Modi-i Congress densema opposition lenirtem aitsüogo.

Kharge-i, iba sorkar ya kanga tedokdak aser linük nung mapa manguba tebilemtsü, jenjang maneni atuba tebilemtsü aser Adani Group ken otem nung tasüngdangbatem atemabo telangzüba agütsütsü memelunger, ta metetdaksü. "ANI report ajanga ashiba agi, Modi-i rupee jenjang maneni tamajungba akümer ta jembio, sorkar indang primary school 71,000 dak tema shibangogo aser nija meyong shisaliok rejutembo teimba-dang akümer, ajisüaka Ato kilonseri item atemaji

Congress aija Ato kilonseri Modi-i, "Sorkar indang schemes balala nungja aser Sanskrit olongtem amshiba karibo ashishir. Sorkar schemes 600 bo Gandhi-Nehru kibong nungja agüja lir ta ni report ka züngshiogo. Pa dak nungi jakzükertemi kechiba Nehru nungja mamshirar ni mangateter. Tsübur agi asü aakba agi mamshir?" ta asüngdang.

Ato kilonserisa Centre nung Congress sorkar aliba mapang nung tim masüba inyakyim ajanga state balala nung sorkartem atsüngdok, ta aija liasü.



ISRO indang AzadiSAT design asür kaketshirtem tangokba noksa nung angur. February 10, 2023 nü Sriharikota nung aliba Satish Dhawan Space Station nungi Small Satellite Launch Vehicle SSLV-D2 nung EOS-07, Janus-1 aser AzaadiSAT-2 satellites bener khakettsüogo.

### 'Cow Hug Day' atema Congress-i Animal Welfare Board aitsür

**New Delhi, Tsüklai/February 10 (Agencies):** Tawa Animal Welfare Board of India-i February 14 ya 'Cow Hug Day' amongtsü ayongzüka liasü saka sorkar tetuyuba nung ajemdaker parnoki iba telemtetba agienba sülen Hokolbarnü Congress party lenir, Jairam Ramesh-i, mezüng nungi shibai iba ya apiteta liasü?, ta asüngdanga aitsüogo. Hokolbarnü Animal Welfare Board of India (AWBI)-i, parnoki February 14 nü 'Cow Hug Day' amongtsü ayongzüka telemtetba agiener, ta metetdaksü. AWBI-i Cow Hug Day nü nüburttem dang nashi dak

aziütsü ayongzüka sülen social media nung nisung aikati iba telemtetba aija liasü. Hokolbarnü Congress general secretary, Ramesh-i twitter ajanga, "Mezüng nungi shibai ibaji apiteta liasü?" ta asüngdang. Brihostibarnü Union minister, Parshottam Rupala-ia, Board-i February 14 nü 'Cow Hug Day' amongtsü ayongzükbaji nüburttemi junga agizük nungbo jungla, ta jembia liasü. February 14 anogo ya alima tesem ajaklen Valentine's Day amonger, ajisüaka India nungbo 'nashi dak aziütba' anogo amongtsü AWBI-i ayongzüka liasü.

Board secretary, S K Dutta-i parnok indang website ajanga, "Tim ketdangser aser Ministry of Fisheries, Animal Husbandry & Dairying-i tuyuba nung ajemdaker Animal Welfare Board of India-i February 14 nü Cow Hug Day amongtsü ayongzüka agiener," ta metetdaksü. Tang mezüng AWBI-i linük nung nashi meimertem dang February 14 nü 'Cow Hug Day' amongtsü ayongzüka liasü. February 14 nü iba anogoji mamongtsü saka nashi meimertem aser nashi dak aziütnertem mashie anogo nung nashi dak aziütsü akok, ta board-i metetdaksü.

### Taruba ita Italy Ato kilonser, Giorgia Meloni-i India semdangtsü

**New Delhi, February 10 (Agencies):** March ita nung Italy Ato kilonser, Giorgia Meloni-i India semdangtsü; yaküm October ita nung ang lai Ato kilonser tenangzüka agia liasü.

sangdong ka ajanga Energy Transition atema asalentong Partnership yangluba sangdong.

Lai India semdangba mapang nung linük ana tsüngda shishilembaba, investment, kiralongra anema raraba aser nüburttem tsüngda tesendaktep tajungba akümtsü atema jembitsü imlar.

European Union nung India atema shishilembaba partner tongti pongu rongnung Italy densema lir aser India nung sen teimba invest asüba linüktem rongnung Italy ya jenjang 12buba nung lir.

Yaküm November ita nung Bali nung G-20 senden aliba mapang nunga Ato kilonser Narendra Modi aser Italy Ato kilonser Meloni na ajurua onük balala nung o lemtepa liasü.

Europe nung India nunger teimtiba aliba linüktem rongnung Italy ya tanabuba lir. Tang Italy nung India nunger 160,000 dak tema lir aser parnok teimbaka northern Italy, central Italy aser southern Italy nung lir.

Linük ana tsüngda tesendaktep yangluba sülen taküm küm 75 ajunger.

February 24 nungi tenzüka Germany Chancellor, Olaf Scholz-ia India semdangtsü aser March ita nung Australia Ato kilonser, Anthony Albanese-ia India semdangtsü.

2021 küm October ita nung G-20 senden nung adentsü atema Ato kilonser, Narendra Modi-i Italy semdanga liasü aser iba mapang nungji Modi-i taoba mapang Italy Ato kilonser, Draghi den senden amenba sülen linük anati külem

Tang G-20 Tirji India lir, anungji taküm linük aika nungi tongti lenirtemi India semdangtsü. Taküm India nungsa SCO sendena ayongzüka akatsü.



Mumbai nung journalist, Shashikant Warishe tepsetba anema February 10, 2023 nü Mumbai kübok Mantralaya nung journalist temi Mahatma Gandhi kürakyanglu anasa longkak aitba noksa nung angur.



# TIR YIMYIM

## YIMOBILEM (EDITORIAL)

DIMAPUR

KÜPTOKNÜ,

TSÜKLAI 11, 2023

### Angati anguba jangotsü

India government ya nübertemi nübertem asoshi inyaksü akümba government ka lir, anungji akok tashi takartem dang nungi alimelen saruba sen agi sensakertem yarir aser linük nung terenlok mapatem inyaker. Item rongnungji sensakertem nem jenjang ajemer jangotsü agütsüba ya ka lir. Iba sentong yagi sensaker kibongtem dang masü saka jang ayoker aluyimertema ajangzükdaksür. Iba ama center government nungi jangotsü teyari yokba agi, talisa, Naga nunger kibongtembo teimbaka mapa meinyaki center government nem mesüdaktsür amai kümogo. Ano, tangbo center government-i jenjang ajemer agütsüba dang masü saka sensaker kibongtem nem jang angati agütsür. Makamaitertem asoshi ibai teyari kanga tulu aser tepelatsüka. Ibayongji, Nagaland nung yimten lenirtemi aiben Naga nungertem angati jang agi mesüba asoshi pelaba lemsatepba angashir. Aji tim. Ajisüaka, kodang asenoki tangar nem angati jang agi asenok mesüdaktsüba tia indang ya bilemdangdir, asenoksasa asenok nümadanga jembitsüba mapa kabo masü. Asenok ya alima lendong timtem tulu atalokba agi talidaka maka aser aluyimdaka maka ta senzür 'refugee' mesüra nemzünempongertem masü. Aji oda, asen lima ya tsüngsang mongpu agi alu raksar yawara agi kangshiba mapanga masü. Ibaji dang masü saka asenok aluyimtsü atema ali makaba purtema masü. Item tensa tiatemji kodang bilemdangdir, asenok azümasenba agi tangar nem asenok ak shibanga yur metsüba ama metsüdaktsüba shiruru telokang ka mesük. Aji oda, kiburi mapang shitak nung chi bener arua agütsütsü, anungji ak kidang alir aktemto mapa teinyaktsüa maka aser shisabolutsüa mali ta litepba tia den kodang asenok center government-i angati yokba jang chiyonga kidang mongtepba tia ya medemdangdir, asenok o ak kidang shibanger metsüba aktem na tsüngda kecha tepila malia ta asenokia rajemtsü. Ano, tang anogo ishika yabo election mapang, anungji candidate-tem dang meshiba sen agi shi ango den metsü mersü alir India government-i angati yokba jang sorur politics jembia amongtsübaji asenok asoshibo kotak lima asütsü. Asenoki tuluka bilemyonga tangbo asenok tiaji ak farm tuluka nung amonger aktemang mesük, anogo piyong mejanga amongtsü aser kiburi chi bener arutsüba mapang ngotepa aser raktepa chiyongtsü. Iba jagi asenoki asen teinyaktsü khuret indang kodanga mebilemdanger. Ashiko, asenok nübertemi angati anguba jang aser angati teyari agidang taküm alitsü bilemba amaji, asenok yimten yimsüsürtemia Delhi nungi jangotsü angati bener arua pei nübertem kecha meinyakdaksüi angati mesütsü bilema jangotsü aser senotsü teyari talila-talila meshitsü dang bilema alitsüa akok. Iba jagi asenok nübertem o yimsüsürtem na prongla tangar dak kisüng metaloker aliba meshimetsür takümtem amai dang alir. Iba jagi asenok kolok aser shisatsü merenloker. Aji oda, asenok kolok nung tangar dang nungi kechi meshitsü ta bilemba dak alaka, asenoki kechi agütsütsü ta asüba tejangraba aser khuretbo anasaia marur. Iba jagi asen lima nung asenoki züsentetba aser yanglutetba maka ser pei nüngdak tilaba nungi tuluba tashi tangar dang nungi India government-i asenok nem ita sen agütsüba agi alia agir. Iba kasa tia aser tangatetba nung asenokbo, India government-i asenok nem angati jangotsü aser teyari agütsüba asoshi par tenüngsanga dang akümüli piyong kecha meinyak 'relief' jang agi taküm alitsü asü (?), mesüra asenoksasa inyaktetba agi asen nüngdak perir külenang tangar dangia teyari yoktettsüa alitsü ? Tanü asenok taküm tia indang ya kodang jungjunga bilemdangdir, asenok nüchiso nüngdakba tesem aika lir aser item nüchiso angutsü nüngdakba tesemtem rongnung tongtibang kaji, India government-i yokba 'relief' jang khen khen jenjang ajemer aser khen khen angati meshia chiyongba tesem ya asütsü. Asenok joko angati mesüra jenjang ajemer 'relief' jang chiyonga kazüba 'designated camps' nungi aser ak kidang aktem ama chiyongli, mejangli aser ngotepli ta kazüba tesem aser tia nungi pilar asenoksasa litetba nüchi tesem ka nung alitsü tenzükdi.

## OLEMSABANG

### Ao kin temenen bushia temulung memeyipra aiatai tiai aitsü

L. Kika Pongener.

*(Yashi adok nungi...)*

Aotsür Aor senso tajungtem, Yerimia ainkar-i Israel kin asoshi mangyima ajepbaji asen Ao kin asoshi ajepba memesuk no...??? Asen senmang asen kidang kilia yinteterem nem agütsüogo, aser tang parnok lenisuba küpok asenok anidaktsüsa kümogo. Akhidang anutoklen alir kintem asen Aor kidang lia school azüngertem, tanübo parnok karbo Minister & MLA jenjang tashi kümer meyiper asenok parnok küpok-ang alitsüsa tensa mapangi bentsür aruogo. Asenoki kanga junga meshisadanger dangashi, asen Aotsür Aor jenjang ya kangasa tesuleni atsüngzüka luadokogo. Asenoki tesuiba mapang tatalokbatem khen meyipa reprangdangra, asen Aotsür Aor dak mamatettsüsa lendong tulu aiben dang atalokogo, ashiko item lendong-to Tsüngremi asenok dak tenarong mesukba asutsüa shibai metet. Küm ishika sua-ogo, Mokokchung jila nung linuk tenzük o Indian army na tsüngda lendong tulu ataloka Indian army-temi dokan kar nung mi senokja tai maketba nisung karbo ki telung nung shibanger rongsetba, karbo injang agi kasetba, aser ojalatem aser asen jalatem kar dakbo yimdong nung jakdak-jakdaka maksu benshibaa ajurua aruogo. Ano anentsüh agi anembanga nisung taküm samaba aser tzümetsüng agi ki-o-jen raksaja taküm samaba lendonga ajurua aruogo. Atangji, item ajak-to bilemdangra, Tsüngremi asen Aor dang kanga jashia merenshiba sudi ta bilemer. Aji oda, item tatalokbatem ajakji shisadangra, Tsüngremi Israel kin sentokba ama asen Ao kin-a sentok asu naa...???... ta kanga sasaa bilemer. Ajiser, tang asenok kechi jenjang nung lir (?)...ta shisadangra, Ao kin Naga nunger madak lenir asuba kin-to tanübo tanitaker kin ka dang kümogo. Asenok kolak nungi korang semzükter tangar kin nem semoktsüogo. Jokorla, Naga nunger kin ajaki asen Aor dang akümtsübuttsü melena tamaket-ang adentsüsa tensa mapang ka aruogo. Anungji arung asenoki tang danga temulung meyiper temenen bushia temenen nangzüka Tsüngrem dangi meyipdi.

Aotsür Aor senso tajungtem, Naga nunger kin shingaia yi bottle bendener atakatema jakreper rongdokba otsü mali, saka asen Aor-i yi bottle atakadema jakreper rongdok, ajisuaka yi ajemer aser yi ayoker Aotsür Aor teimba. Revival milak Ao lima nungi jangrua tenzük, aser Naga lima sunga ayimsunga ao, saka tang Aor tamang jenjang koda lir...??? Naga nunger rongnung mezüng Khristan yimsu agizükba kin 'Aotsür Aor' aliba yimtsüng aser Jila nung Election nung sen yong pei temeden vote ayoker, polling station coup asur, proxy vote agütsür, nisung teshimtet kari dang nubur ajunga meyong vote ajener...Election mapang nisung tepseta azü tokshiba aser tashiyim mapa tamajung ajak Ao lima nung inyaker. Asen Ao kin alima nubur aser Tsüngrem tsüngdang khuret tulu lir. Anungji item temenentem ya küküa lumia sarasadema menangzükra asen Ao lima nung nutsüng nubur rongnung temoatsü malitsü.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## India nung küm 400 tejaklen yangluba Tenla ki ka bendoktsütsü



India kübok Daman nung Portugal nung yimsüsüba mapang küm 400 tejaklen yangluba Our Lady Of Remedies Tenla ki noksa nung angur.

**February 10, 2023:** Anüolen India nung akhidang Portugal nungeri yimsüsüba mapang asüba Tenla ki ka bendoktsütsüa akok, kechiyong ketdangsertemi iba kimong nungji football stadium ka yanglutsü tebilemba lir, ta yangji aliba Khristantemi metetdaksü.

Gujarat state anasa aliba Daman & Diu nung Administrator aser BJP lenir, Praful Patel-i asalentong yangluba kübok Daman nung Our Lady Of Remedies Tenla ki bendoktsütsü.

Daman & Diu ya territory ka lir aser iba territory ya New Delhi nung BJP-i aniba teloktep sorkari ketdangser.

Daman & Diu Territory administrator, Patel-i tang tashi nungbo iba Tenla ki bendoktsütsü asü mebendoktsütsüar memetdaksü.

Osangbener den jembidang pai, "Ni kecha memetet, nenok aliba tesem nung ketdangsertem dang asüngdangang," ta dang langzua liasü.

Ajisüaka yangji aliba

Catholic Khristantemibo, administration-i iba Tenla ki bendoktsütsüji tejangja, ta metetdaksü.

Yangji aliba Khristan lenir, Rui Pereira-i, "Parnoki Tenla ki aliba kimongji aginer. Parnoki kodang iba aliji agidir parnok sünütsü asütsü. Parnoki yangji football asayaba moapu ka yangluner, anungji Tenla kiji bendoktsütsü. Onoki parnok tebilembaji jungjunga metetogo, kechiyong onok sowar masü," ta metetdaksü.

Tawa Pereira den Khristan lenirtemi Daman Municipal Council Tir, Sonal Patel ajurua iba tebilemtsü onük lemsatapa liasü.

Daman ya Portuguese colony asüba mapang 1607 küm iba Tenla ki yanglua liasü.

1961 küm Portuguese colonial yimsüsüba Daman & Diu nung anena liasü ajisüaka yangji aliba Khristantemi maneni iba Tenla kidang tekülem sentong agir.

Archaeological Survey of India (ASI)-i iba Tenla ki ya heritage site ta mesangdong,

ajisüaka iba Tenla ki ka khenyongi balaka yanglu, anungji wazüka ayutsüla, ta Pereira-i ashi.

ASI-i iba Tenla ki ya heritage kiojen ta mesangdongba ajanga iba Tenla ki bendoktsütsü atema ketdangsertem temelung uludaksü, ta pai ashi.

"Tenla ki ya mebendoktsütsüla. Onokia Khristantem pusemer," ta Daman Municipal Council Tir, Sonal Patel-ia shiogo.

Kasa council nung züngsem, Pramod Rana-ia Khristantem pusema jembio.

Rana-i, "Iba dak sendakba nung telemtetba magidang yangji aliba Khristantem den mezüng jembitsüla, ta onoki bangzüng ka renemogo. Yamaji zübazüba Tenla ki bendoktsü atema onoki temelaba magütsütsü," ta ashi.

Iba Tenkla kidang tekülem sentong ketdangsüa agir putir, Brian Rodrigues-i, "Onoki iba ken o ya Bombay High Court nung benoktsü renemdar," ta metetdaksüogo.

## SC-i state tenet dang Khristantem reshikangshiba report meshir

**New Delhi, February 10, 2023 (Agencies):** India nung temaba court Supreme Court (SC)-i India kübok state tenet dang peipei state nung Khristantem amakba mesüra Khristantem meyong kiojen raksatsüba nokdangtsü atema ozüng benokba agency temi kechisa inyakar report tejangja agüjang, ta tuyuogo.

February 06, 2023 nü Chief Justice, D Y Chandrachud leniba nung Supreme Court bench kati Bihar, Chhattisgarh, Jharkhand, Odisha, Karnataka, Madhya Pradesh aser Uttar Pradesh state sorkartem dang taruba hopta asem tsüngda iba osang tejangja agüjang, ta tuyu.

Bangalore nung tongti putir, Peter Machado den National Solidarity Forum aser Evangelical Fellowship of India longjemer Supreme Court nung benokba temepishiba ken o ka angadanga sülen SC bench-i state tenet nem iba tetuyuba agütsü.

Yaküm September 1 nüa Supreme Court-i Union home ministry dang state balala nung Khristan lenirtemi ashiba ama Khristantem aser Arogo meyong kiojentem anema inyakba osang state 8 dang nungi meshiang, ta tuyua liasü.

State 8 dangji 2021 küm peipei state nung Khristantem anema inyakba osang tejangja bendener report yanglua agüjang, ta SC-i tuyua liasü.

Supreme Court-i, tamalen state tem nem tetuyuba agütsüba shidak inyakdar asü meinyakerar metettsü atema item ama tetuyuba maneni agütsütsüsa akümer, ta metetdaksü.

Item ama obendang aser tetuyuba agütsüba ajanga Khristantem densema minorities anema inyakba tatalokbatem atema state temi kuli agütsüsa akümer, ta SC-i metetdaksü.

Ajisüaka Union Home Ministry-i, state kati dang report

agütsü, ta metetdaksü.

Union home ministry-i affidavit ajanga Supreme Court dang, item ama tatalokbatemji aika tiyazü mesüra mashileni ratetba liasü, ta metetdaksü.

"Ken o karbo yimsü nung ajemdaker masü saka ozüng alema inyakba liasü aser ken o karbo nija mangatettep nungi adokba liasü, saka ajakji Khristantem anema inyakba, ta parnoki züngshir," ta Home Ministry-i affidavit ajanga metetdaksü.

Khristan lenirtem aser tentetemi ashiba agi, 2021 küm India nung ita shia Khristantem anema inyakba tatalokba 45 nungi 50 tashi liasü.

Parnokisa Supreme Court dang linük tesem ajaklen Khristantem aser Arogo meyong kiojen aser rejutem kümzüksü atema inyakdaksüner, ta mepishia liasü.

Nütsüng billion 1.4 aliba India linük nung nütsüng shilem 2.3 dang Khristantem lir.

## ANOGO ABEN TSÜNGREM DEN

### Sarasadem ajanga sentsü melen

"Aser pai sarasadem dang, Pa tejak tereprangtsü melen adok"- Lk. 9:29

Kodang asenoki alima nung Kibuba indang bushidir tenem kolak ama tatalokba tenet teti angutsü. Item tenetji Pa asoba, baptiba, atitangba, sentsü melenba, kangki nung angenlokba, tasü nungi shia aruba aser kotaki atuba angutsü.

Kibuba Yisu taküm nung tatalokba rong nung tiyongtsüji Pa sentsü melenbaji alitsü, aser ibai tetezü aketba tenem temejongji alitsü. Ibai Tebui Techir dak temulung achiba jungkai adokba lir. Ano iba yagi asen Kibuba Mosa aser Elija dang nungi temaba ta jangjatsüba lir. Iba yagi asen Kibuba Pa yimli nung sentsü wangshia arutsü indang sayur.

Saka asenoki Luke 9: 29 nung aliba ojang asemji " Pa sarasadema alidang" sendokra asenoki tanelaren tayongzükba sendoker. Pa sarasadema alidang Pa tejak melenshi. Asenoki teti sarasadema lira Kibuba dak kichi atalok aji asenok daka ataloktsü. Tanelaren asenok daka terenlok kaa akümtsü. Anungji asenoki asen nükla nung Kibuba sentsü melenba yur sarasademi temelenshi adokdaksübaji reprangra -

Mezüngbuba nung, taküm jenjang tangatetba melenshitsu. Chichiba sarasademji asen tanelaren tenem kolaki atuba lir. Tenem kolak nungi alima noksa melenshia anguba ama sarasadem ajanga tanelarena melenshitsu. Kodang tenem kolaki tudir lenden nungi manguba tongtipang osettem tenem kolak nung jagi angur. Lenden nungi ki tulu ta anguba to tenem kolak nung iba ki tuluji tajento tila ka ama dang angur. Lenden nung tongtipang masüba osetem to tang tenem kolak nung tongtipang oset akümer, kechiaser lenden nungi nüngdak ajakbo ayimjema mangur.

Kodang asenoki sarasadem ajanga Tsüngrem tenemi tudir asen nüngdak aser tashi mait ajak aseni angur. Iba tenem nungi asenok Tsüngrem den lungjemba tesadamba aser takangba angur. Mesükba aser chichiba ulubaji asenoki jangjaa angatetter. Lenden nung asenoki kanga tulu ta repranga aser bilemba ajak Tsüngrem den lungjemba tenem nung kanga ilaa angur.

Miim sarasadem tenem nungi Tsüngrem tenüki anguba ajak asenoki angur. Oset tulu ajak tila ama angur aser tila ajak tulu ama angur. Shi tejangraba tuluji, taginü tuluji sarasadem tenem nungi kanga tila angur. Kotaker mangdangji dang amungtema alitsü. Tiyazü aser ochi sarasadem tenem nungji jangjatsü. Asenok taginüba, shisabulu, tebilemtsü, sentong, mapa inyakba ajak idakji sütepa adoktsü.

Asenoki maneni miim sarasadem aliba ajanga ya ataloktsü. Kotaker Tebu den asenok miim temulungjang aliba ajanga ya ataloker. Asenok takok jenjang aliba temabai ajungketer. Kodang asenok temeyoktep lima nung ajungketer; kotaker tenük agi anguba osettem asen tenük agi angutsü. Iba anogo koda tepelatsü anogo asütsü!

## Sarasadem leniba Hallow App million 4 ben download süogo

**February 10, 2023:** dang imdangi arua liasü. Khristantem sarasadem leniba Kangki, Tebu-techir aser tanela temeshi noksa dang imdangi aru, aser ibaji khenyongi balaka liasü," ta pai metetdaksü.

Iba sülen Jones-i pastor tem aser medemertem den sarasademba ya Khristan yimsü den ang sendaktepa alitsüa akok ta o lemtepa aru.

Iba sülen Jones-i Catholic meditation & prayer app ya yanglu aser 'Hallow' ta nüngja agütsü; koba tetezü "temeshi akümtsü".

"Kodak nung aliba Obala, Nü nüng temeshi süang. Iba ya ajanga kü taküm melenshi aser nüktsü alua liasü," ta paisa shisem.

Hallow app ya arrshi küm 29, Alex Jones-i 2018 küm tenzüka liasü. Tamalen interview ka nung jembidang Jones-i, secular apps Headspace aser Calm ajanga tajangzük anguba nung ajemdaker Hallow app tenzüksü atema pa ajungmesoa liasü, ta metetdaksü.

Jones-i, "Pei kidang nungi sadem-sadema sarasademtsü atema item ya tashi tulu aliba hadir lir ta ni bilema liasü," ta metetdaksü.

"Ni sarasademba mapang shia kü melungjang nung Khristan yimsü dak sendakba

dang imdangi arua liasü. Khristantem sarasadem leniba Hallow app 2018 küm tenzüka sülen tang tashi nung linük 150 nung million 4 ben dak tema download süogo aser iba app ajanga sarasadem million 100 dak tema agiogo.

Tanübo alima tesem balala nung Khristan denominations ajaki anogo shia sarasademba nung lenitsü atema iba app ya amshir.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Oshiolem**

(n) nübori jembiba otsüoren tapu balala küma züluba (literary genre)  
\* Asen sobaliba indang oshiolem kaket sapua azüngtsüla.

**Oshioyim**

(n) oshi amshiyim aser züluyim ( usage of language)  
\* Oshioyim timi amshiba agi tangatetba agütsür.

**OLONG PAITEP # 6425**

Grid for crossword puzzle #6425 with numbered squares.

**TIPILEN**

- 1. Putep - (4)
3. Aria bilemba shisatsü - (6)
6. Aginü - (6)
9. Mezüng nisung - (4)
11. Nenü-er jabaso - (4)
12. Ajungben timtem - (7)
13. T \_ \_ \_ \_ g - (4)
14. Perir anüng - (4)
17. Ango tashi - (6)
19. Temekong mapang - (6)
20. \_ \_ \_ \_ shin - (4)

**LANGTSÜNGLEN**

- 2. Aginüdaktsü - (3)
3. Tapok - (4)
4. Ain tamajung - (3)
5. Yongi atakba oset ka - (5)
7. Entsü mokodangba an - (5)
8. Shiruru apuba temenatsü - (4)
10. Chiyongtsü tali chir kangshi - (4)
11. Talangka mepila - (5)
13. Luja menütsü - (5)
15. \_ \_ \_ \_ ra - (4)
16. Nüma matang - (3)
18. Mulunga langzü - (3)

**OLONG PAITEP # 6424 TELANGZÜBA**

**TIPILEN :**

- 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

**LANGTSÜNGLEN :**

- 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.


**NAI-A YA METETTER MA**



**Khlong Yai Reservoir**

Thailand lima Rayong nung yanglua aliba tzü tangdang (dam) ka yangi noksa nung angur. Tsüngluruwa mongpu nung iba tzü tangdang nungi alu atema tzü bener aor. Koda temenungratsüka.

**Noksa nung meputepi aliba 10 bushiang**



Arunachal Pradesh kübok Lumla Assembly constituency nung BJP candidate Tsering Lhamu den tetokteper shinga mali takok nguogo. Tsering Lhamu ya asür MLA Jambey Tashi kinungtsü lir aser Hokolbarnü nominations meyipa agiba mapang tembangba sülen 1-Lumla (ST) Assembly Constituency returning officer Rinchin Dorjee Thungon-i BJP Tsering Lhamu-i takok anguba osang metetdaksü.

**Trinamool Congress-i taruba Meghalaya sorkar akümtsü**

Shillong, February 10, 2023 ILP tebilemtsü atema agütsü" ta Meghalaya TMC (Agencies): Meghalaya nung telangzüba kecha magütsü" ta Meghalaya State Legislature Party Leader aser Mukul Sangma lenisüba kübok AITC Meghalaya State Leader of Opposition, Dr TMC-i sorkar akümtsü ta President Charles Pyngrope-i Mukul Sangma-i ashi. Trinamool Congress lennir ashi. "National aser regional party temi Northeast dak letetogo aser TMC-i sorkar sendakba onüktem atema ola akümtsübaji tejangja lir. Iba madoker. TMC MP-ibo alizüng nung onoki Meghalaya Meghalaya nunger dak nung alirtem asoshi inyaksü sendakba onük 4-5 tashi lemteogo" ta pai ashi. benokogo" ta pai ashi.

TMC Meghalaya-i state "Tang mezüng atema Meghalaya sorkari tesayurtem nung alirtem den sendaktepsü meshimok aser tanurtem nem ta Derek O'Brien-isa ashi. "Centre sorkar tang tashi shisaliok bushitsü tenokdangba ta Mukul Sangma-isa ashi.

**Manipur nung BJP lanur lennir ana züka merenshi**

Imphal, February 10, 2023 Sureshkumar aser BJYM denner kidangi meyipa aodang (Agencies): Manipur nung office secretary Alex lendongji ajuru ta osang ajanga BJP lanur lennir ana February Ningombam na lir aser tena ashi. 9 aonung mejangjaba nisung kanga mejungi yirua lir. Chief Minister, N Biren kari züka merenshi. Iba lendong atalokba sülen Singh-i iba tatalokba khukhua

BJP züngsem ana ya BJP tena Imphal nung aliba Raj aitsüogo aser state sorkari Manipur Pradesh Medicity nung anioka lir. bushisüngdang ka tenzükogo ta spokesperson Mayanglambam Tena ya sentong ka nung pai ashi.

**India-Myanmar arrtsülen anasa bomb 2 apok, 1 asü**

Imphal, February 10, 2023 (PDF) aser Kuki National osang angazüker. (Agencies): India-Myanmar Army (KNA-B) teloktemi PDF ya National Unity arrtsülen anasa Moreh nung bomb ji pokdaksü ta osang Government of Myanmar angazüker aser iba ajanga (NUG) indang kongsang lir

Osang angazükba agi bomb Manipur nung Indian security aser May 5, 2021 nü tentet. agencies kümdangshiogo. February 1, 2021 nü Myanmar nung mitkartemi sorkar indang headquarters amakdang atsüngdokba sülen NUG apok. Manipur nung telungpur ka tenteta liasü. People's Defence Force telungpur ka asü aser 7 yiru ta

**Taruba küm 5 tsüngda Greater Tipraland takhangba samatsü: Deputy CM**

Guwahati, February 10, 2023 nungi Tripura Tribal Areas adokdaksü. BJP-i nangzükba (Agencies): Taruba küm Autonomous District Council onüktem ajanga Tripura state pungu tsüngda Greater (TTAADC)-i indangindanga tajungba akümtsü aser taruba Tripura Deputy Chief Minister central schemes meshitetsü, ta küm pungu tsüngda Tipraland Varma-isa ashi. takhangba samatsü" ta paisa Jishnu Dev Varma-i ashi. ashi.

BJP indang election Iba ya TIPRA Motha den toktepsü atema yangluba asü ta Kechiba BJP-i mapa manifesto nung tenangzükba aser asüngdangdang agütsütsü menangzükur ta "state lemsatsüba dak alaka asüngdangdang "sorkar office nung lisopurtem ajanzüktsü aser tem nung mesüra tesayurtem aser renloktsü. manifesto nung enoksema lir" ta ama nisung ajak manioktetsü aser renloktsü. aser tamasa rejutem lapok nung BJP indang election manifesto nung terenlok nung "CPIM-i 1980 sülen dang mapa adoktsü" ta Varma-temulung agüja lir aser tang nübortem tsüngda telemsa isa langzü.

**Format C-1**

(for candidate to publish in Newspapers, TV)

**Declaration about criminal cases**

(As per the judgment dated 25th September, 2018, of Hon'ble Supreme Court in WP (Civil) No. 536 of 2011 (Public Interest Foundation & Grs. Vs. Union of India &Anr.)

Name and address of candidate : **A. PANGJUNG JAMIR**

Name of political party : **Bharatiya Janata Party**

(Independent candidates should write "Independent " here)

Name of Election : Nagaland Assembly Election 2023

Name of Constituency : 21-TULI (ST) AC

I, **A. PANGJUNG JAMIR**, a candidate for the above mentioned election, declare for public information the following details about my criminal antecedents :

(A) Pending criminal cases				
Sl. No.	Name of Court	Case No. and dated	Status of case(s)	Section(s) of Acts concerned and brief description of offence(s)
1	Special Judge NIA DIMAPUR	CASE NO.: NIA CASE RC 1/2016, RC 01/2016/NIA-GUW Dated 18.08.2016 Chargesheet No. 01/2017	Order of Cognizance against him has stayed by the Hon'ble Kohima bench of the Hon'ble High Court of Guwahati vide order dated 06.08.2018 WP (CRL.) 4(K) OF 2018.	384 IPC Sections 25(1-b) Arms Act Section 7 & 8 NSR, Section 13 Drugs and Cosmetics Act Section 10 & 13 UA (P) Act, Section 39 & 40 of UA (P) Act.  (Extortion, Acquiring Arms that has been specified in that notification of contravention of that section, Penalty for Subversive Acts, Punishment for carrying or possessing Arms, penalty for being member of an unlawful association and punishment for unlawful activities, Support given to a terrorist organisation, raising funds for a terrorist organisation.) Allegations are that while serving as a Govt. Officer in the land resource department of Government of Nagaland NIA alleged that I supported the the terrorist organization NSCN(K) and I have given government fund to NSCN(K).
(B)	Details about cases of conviction in criminal offences	NOT APPLICABLE	NOT APPLICABLE	NOT APPLICABLE
Sl.No.	Name of Court & date(s) of order(s)	Description of offence(s) & punishment imposed	Maximum Punishment Imposed	
NOT APPLICABLE	NOT APPLICABLE	NOT APPLICABLE	NOT APPLICABLE	

**Impur Christian Hospital**

Impur : Mokokchung, Nagaland

**ADVERTISEMENT**

Applications are invited from the unmarried girls for undergoing GENERAL DUTY ASSISTANT/BEDSIDE ASSISTANT course at the Impur Christian Hospital, Impur, Mokokchung for the season 2023.

The following particulars are given for information of interested candidates.

1. The sessions will start from 1.3.2023
2. The last date for receipt of the application is 18.2.2023
3. Application form will be available from Impur Christian Hospital
4. Age : 14-25 years
5. Qualification : Read upto class VIII (eight)
6. Free accommodation will be provided
7. Training fee will be free.
8. Duration of the Course: 10 months

Sd/-  
Medical Superintendent  
Impur Christian Hospital

**PELABA LEMSATEPER**

Signal Angami Village, Dimapur nung Tribal Affairs Department, GOI kübok Phom Community Hall yanglutsüba atema Signal Phom Union (SPU) ajanga Moatoshi Ao, Hon'ble MLA 2 Dmr-II A/C dang pelaba lemsateper.

Sd/-  
**H. Metjei Phom**  
President, SPU

Sd/-  
**P. Henneyei**  
Gen. Secy, SPU

**DRIVER KANÜNGDAKER**

Dimapur nung gari anishitsü atema Lengrijan, DC Court area, Aokong, Duncan & Mon Basti nung alir nübu ka nüngdaker.

Itasen - Rs 8,500/-

Tejangrartemi iba number ajanga tongtepratepang : 7005083159

**Mali, Guinea aser Burkina Faso linüktem regional blocs-i aitner**

**Ouagadougou, Tsüklai/February 10 (Agencies):** agütsüba sangdong nung shia liasü.

Tawa mitkar tashi amshia 2020 küm nungi tenzüka sorkar atsüngdokba West linük asem nungya melentepa African linük asem nungi mitkar temi sorkar atsüngdoka foreign minister temi regional liasü, anungji regional telok tem blocs tongtipang ana nung nungi anentsü.

parnok tanaben inoktsü Sahel region nung tensa ajungshia liasü. Tawa Russian tamajungba akumba ajanga envoy Sergey Lavrov-i iba minister asem yagi lungjemer iba temelenshi ya arur. mera agitsü molungtep, ta sangdong ajanga ashi.

Mali, Guinea aser Burkina Russia den mitkar tsütsü Faso indang diplomats temi tesendaktep tajung alitsü mechi Brehostibarnü sangdong ka Mali ya France den pila, koba nung ashiba agi, Economic par indang taoba colonial power Community of West African aser akhi mapang nung tembar States (ECOWAS) aser African ka liasü, aser Burkina Faso-ia Union (AU) nungi parnok kasaji inyaksü aki, ta aikati anenja aliba agientsü asoshi bilem.

lungjemer inyaksü molungtep. Nisung meyirijang aika Telungpur telok balala den takum samaja aser million aika rara aliba West African linüktem pei kidang nungi aridokba nem teyari agütsütsü nangzüka mechi mitkar dang jashia aliba hopta tetenzüklen Lavrov-i Mali tens aka nung mitkar temi Mali semdangba sülen Mali nungi aser Burkina Faso nung yimten Abdoulaye Diop, Guinea nungi atsüngdoka liasü.

Morissanda Kouyate aser Guinea nungbo mitkari Burkina Faso nungi Olivia sorkar atsüngdokba ya yimya Rouamba nungertem balaka liasü, kong iba mapang Burkinabe yimtiba tir inyaka alisang Alpha Conde- Ouagadougou nung jembishini i pa kisüngi tashi amshia yimsü kaa liasü. asütsü merangba anema

ECOWAS aser AU ajanga suspension mera agia aliba aser yanger tenzü.

danga tenokdangbatem agientsü asem dang tekeraba nung inyaksü linük aseme molungtep, ta senden amenba sülen külemi ajungshir.

**Russia-i Moldova alema missiles khaloktsü**

**Kyiv, Tsüklai/February 10 (Agencies):** Russia-i tang tesüsa

anünglen nungi Ukraine anungden nungi Ukraine amakdang Moldovan airspace alema missiles ao, ta Ukraine aser Moldova ketdangsur temi ashi.

Kyiv mitkar leniri ashiba agi missiles tem ya Romania alema ao - koba Romania-i magizük, saka kasaji maneni Ukraine Tir Volodymyr Zelenskyy-ia ashi.

Missiles ya NATO ayongzüka temaitsü lir, ta Zelenskyy-i ashi, kong Romania ya züngsem linük ka lir.

Russian sorkar odongtar kati iba tatalokba indang tasüngdangba melangzü.

Teti ama osangbener den jembidang Dmitry Peskov-i iba ken o ya defence ministry atema lir, ta ashi saka tang tashi sangdong kecha agüja mali.

Moldova linük ajanga missile alema aoba ya aibelen ka lir, ta iba linük indang defence ministry ajanga ashi iba tatalokba indang rateta ashitsü asoshi Russian ambassador jaok, kasaji

October ita atalokdang inyaka liasü.

Chisinau nung yimtenren tsütsü mangatetep adoka aliba mapang iba ya ataloka liasü, kong sorkar lenir ajunga mapa nungi anena lir. Romania-i Russia nunger missile tem ya kodanga par airspace ajanga mao, ta ashi.

Zelenskyy-i Russian missiles ya "collective security" atema tasüngdangba ka lir, ta ashi.

Hokulbarnü missiles 71 khaloktsü aser item rongnung 61 khazüka yok, ta Ukrainian air force ajanga ashi.

Iba sülen Zelenskyy den yariteper kati anüolen linüktem dang fighter jets agütsütsü ajungshi aser par linük nem nok-nü tasen agütsütsü asoshi nungnangba aija liasü.

Zelenskyy-ia EU lenirtem ajurua par nem tayimtsü agütsütsü ayongzüka liasü aser kasa nükjidong nung UK semdang.

Region trok nung energy facilities nung amakba sülen

Ukraine nung electricity agi tim atemer.

Anüdoklen Kharkiv region kisüng nunga kibong 150,000 shi nung electricity maka tim atemer aser nisung tenet yiru, ta ketdangsur temi ashi.

Kyiv nunga tapokba ola angashi, saka iba yimti indang mayor-i shinga meyiru ta ashi.

Yangji alirtem metro system nung jenok aser station ka nung school lesson agia liasü.

Kharkiv aser Zaporizhzhia densema danga region tem nunga maka liasü aser Mykolaiv region indang governor-ia missiles tem tzüsem ama asemen khaloktsü, ta ashi.

Mongpu mapang Moscow-i Ukraine indang energy facilities nung aiben tenük yoker ama aser Hokulbarnü amakba ya 14 ben buba liasü, ta Ukraine indang state energy ajanga ashi.

Iba ama amakba ya 'war crimes' lir ta aikati ashir saka Russia-i metetsümonga civilian tem yirutsüba masü ta ashir.

## Sports Minister Anurag Thakur-i Khelo India Winter Games lapoktsüogo



**Gulmarg, Tsüklai/February 10 (Agencies):** Sports Minister Anurag Thakur-i Hokolbarnü Gulmarg nung tasembuba Khelo India Winter Games lapoktsüogo. Iba mapang pai Khelo India centres 40 semzüksü aser Winter sports atema centre of excellence yakta lapoktsütsü shia liasü.

Iba asayamung lapoktsüba mapang Thakur-i Jammu & Kashmir nung maneni rongsen lenmang ajanga aser Coach tajungtibatem anir arua yaritsü ta ashi.

"Iba tesem nung Centre of Excellence for Winter Sports yakta lapoktsü" ta pai Khelo India centre 40 tashi semzüksüba mapang shia liasü.

Jammu & Kashmir lieutenant governor Manoj Sinha-a iba sentong nung tena liasü aser saisapong ajanga India lima lokti aser nübur longjemdaktsütsü tashi lir ta pai shia liasü.

Hokulbarnü iba asayamung lapoktsüba sentong nung Jammu and Kashmir Lieutenant Governor Manoj Sinha dena liasü aser pai linük lungjemtsü aser nübur atema temelenshi bener arutsütsü asoshi saisapong ya gari ka kumdaktsütsü, ta ashi.

Jammu aser Kashmir nung saisapong indang ki-o-jen ya linük nung saisapong tsütsü tajungtiba state tem den sako kumogo, ta Sinha-i ashi.

"Saisapong ajanga nisung ka kija dang masü saka lokti ajunga melenshidaktsütsü tashi lir," ta Shinha-i Srinagar nungi kilometers 55 pilar aliba tesem nung tasembuba Khelo India Winter Games lapoktsüba mapang shia liasü.

Jammu & Kashmir asoshi Khelo India Winter Games tesentepdak ka amai asüba ya konang tulu, ta pai sa ashi.

"Iba asayamong ajanga India lima nung aliba state 29 aser union territories ajak külemi

longjemdaktsüogo. Kashmir lima tepur ajung, penzüpenpong, nübur anepaluyim aser libaliro ajak nguyuts? ayongzucker," ta Lt Governor ajanga shia liasü.

Sinha-i asayar 1500-i iba asayamung nung shilem agiba kisung masü saka Kashmir lima indang osangtajung peroker kaka ama aotsü imlar, ta shisem.

"Jammu & Kashmir nung saisapong asoshi budget sen crore 38 agi dang Maharashtra ama state dang nungi ishiba lir. Aser Kerala ama state dang nungibo teimba," ta Shia India Ato Kilonser Narendra Modi dang tepalaba lemsatepa liasü.

"Saisapong nung küm 60 shi kecha tashi mali aru, saka PM Narendra Modi tejangraba ajanga item ajak temelenshi aruogo," ta paisa ashi.

Iba Winter Games nung state aser union territories 29 nungi asayar nisung 1500 tashi asaya tabu balala 11 tashi nung tokteper aser ibai Mongolbar anogo tashi asayatsü.

## Cristiano Ronaldo-i league goal 500 dak tema agütsüogo



**Riyadh, Tsüklai/February 10 (Agencies):** Brehostibarnü Saudi Pro League nung Al Nassr-i Al Wehda madak goal 4-0 agi akokba goal ajak ya Cristiano Ronaldo-i agüja liasü aser pa club career nung league goal 500 alem agütsüteter kumogo.

Arishi küm 38 tain Portugal nung football asayar mongin, Ronaldo ya league pongu nung team balala pongu nungi asaya arudang goal 503 agütsütetogo.

Pai Manchester United atema goal 103, Real Madrid atema 311, Juventus atema 81, Sporting Lisbon atema asem aser tang Al Nassr atema goal pongu agütsüogo.

United den tako chitepa pilaba sülen pa Al Nassr nungi asaya tenzüker goal pongu agütsüogo.

Brehostibar aonung pai asaya tenzüker minute 21 buba nung goal 500 buba ya tetsüng abelen agi yoka liasü.

Mezüng shilem asaya tembangtsü lia tetsüng achichi agi 2-0 kumdaktsü aser second half tenzüker minute ti buba nung penalty metsüa hat-trick goal agütsüteta liasü.

Iba hat-trick ya pa atema 61 buba liasü. Asaya tenzüker ghonda ka jungle pai goal pezü buba agütsü.

Ballon d'Or ponguben ngua alisang Ronaldo ya December ita Al Nassr den küm ana ser tesadang atema sen million euro 200 dak tema (million \$216.54) agi tezüngzüktep ka yanglua team captain shim.

Pa ajungbena Saudi nung asaya tenzükerba ajanga sen million euro 400 dak tali aazüker, ta osang kar ajanga ashir.

Yangji Saudi Arabia-i 2030 World Cup ayongzüksü imlaba ajungkettsüba atema sen euro million 200 densema lir, ta ashir.

## World Aquatics Championships 2025 Singapore-i belenogo

**Singapore, Tsüklai/February 10 (Agencies):** 2025 World Aquatics Championships ya Singapore nung alitsü, ta World Aquatics ajanga metetdaksü.

2025 World Championships ayongzüksü atema Kazan-i bid asayaba nung takok ngua liasü, saka linük balalai Russia nem tenokdangba agütsüba ajanga Singapore nung ayongzüksü.

"2025 atema asen sentong tongtiba iba ama teka tajung nung ayongzüksü meteta World Aquatics kanga pelar, Singapore nung aliba team dang kanga pelar," ta World Aquatics president Husain Al-Musallam-i Brehostibarnü ashi.

"Asen athletes den lemsateptsü imlaba ajak Singapore nung lir: world-class facilities, jenjang tajungtiba nung asaya ayongtetsü tajangshiba

kuli aser tematiba jenjang nungi community tashi aquatic sports atema lenla ajaklen tetemsü lir."

Iba asayamung asoshi anogo melemteti lir, kong World Aquatics indang züngsem 209 federation nungi athlets 2,500 dak temai shilem agütsü imlar.

Taküm July ita 20 buba World Aquatics Championships ya Japan kübok Fukuoka nung ayongzüksü. Iba asayamung ya 2021 nung alitsü liasü, saka COVID-19 tashidak wara aser iba dak sendakba nung senzüsempingba tsütsü tenokdangba aliba ajanga anaben thina liasü.

21 buba World Championships ya 2023 meyi nung ayongtsü liasü saka 2024 küm February ita Doha nung ayongzüksü sentong yanglushi.

## Rishabh Pant-i pa temang tajungba akumba lemsatep



**New Delhi, Tsüklai/February 10 (Agencies):** Taoba küm gari lendong ka nung yiruba nungi taneptsü anguba indang India nunger cricket asayar Rishabh Pant-i social media nung lemsatepa liasü. Pant ya taoba ita temokok surgery agi aser taküm Indian Premier League aser ODI World Cup nung shilem magitetsü.

December 30 anepdang pa indang gari ya divider nun goa tsüka Pant yirua liasü. Pa ya Delhi nungi par ki aliba tesemi aodang lendong ya ajuru.

Lendong atalokba tesem nung aliba mozüki ka nung khen anepaluba sülen pa Dehradun nung jurila mozüki kati anir ao aser iba sülen BCCI ajanga pa tayimtsü nung Mumbai bushia anir oa yangji anepalua liasü.

Pant-i Twitter nung noksa

kar lemsatep aser yangji "Mera ka tejakleni, mera ka tashi taitba, mera ka tajungba," ta zülua liasü.

Iba tia maka lendong ya Hammadpur Jhal anasa Roorkee den arütsü Narsan anasa ataloka liasü.

BCCI ajanga Pant yiruba osang sangdongba nung pa tenütsü nung zübo ana, temokok achichilen 'ligament tear' aser ano pa teka, shibalang, tetsüng temeyong yiruba den teberem yiru, ta ashi.

Arishi küm 25 tain Pant-i tawa pa indang Twitter nung pa iba gari lendong nungi takum kumzükba atema nisung ana dang pelaba noksa lemsatepa liasü.

Pa kumzükber nisung ana ya Rajat Kumar aser Nishu Kumar lir, aser tena dang kanga pelar, ta pai shia liasü.

## BILEMDANGANG

"Nü tenüki tajung dang ngura nai alima meimtsü, nai o tajung jembira alimai na meimtsü."